

四庫全書

史部

欽定四庫全書

史部

欽定續文獻通考卷二百四十三

四

主事_臣陳若霖覆校

總校官內閣中書_臣孫溶

欽定四庫全書

欽定續文獻通考卷二百四十三

四裔考

西南夷

雲南土司二

緬甸

宋寧宗時緬始通中國

緬國為西南夷不知何種其地有接大理及去成都

不遠者又不知其為方幾里其人有城郭屋廬以居
有象馬以乘舟筏以濟其文字進上者用金葉寫之
次用紙又次用檳榔葉蓋謄譯而後通也是時與波
斯等國進白象為通中國之始

明史土司傳曰緬古朱波地在雲南西南最窮遠
與八百占城接境有城郭廬舍人多樓居

元世祖至元二十年官軍伐緬克之

先是屢遣使緬國招諭內附迄無降心乃詔宗王僧

格達喇右丞台布參知政事伊克德濟將兵征之是

年九月大軍發中慶十月至南甸台布由羅必甸進

軍十一月伊克德濟取道於阿昔江至江頭城

入緬有三

道一由天步馬一由驛甸一由阿郭地界俱會緬之江頭城

斷緬水路桑格達喇

自將一軍從驛甸徑抵其國與台布軍會諸將分地
攻取破其江頭城別令將以兵守其地積糧餉以給
軍士遣使持輿地圖奏上至二十四年緬始平

成宗大德元年緬遣子奉表入朝

詔封的立普哇拿阿迪提牙為緬王賜銀印子合八
的為緬國世子賜以虎符四年五月的立普哇拿阿
迪提牙為其弟阿散哥也等所殺其子窟麻刺哥撒
八逃詣京師即封為王并命將率師往問其罪八月
緬國阿散吉牙等昆弟赴闕自言殺主之罪罷征緬
兵

明太祖洪武二十六年緬始遣使至

時因八百國王諭意故也次年置緬中宣慰使司以

土酋卜刺浪為使永樂元年緬酋那羅塢願臣屬中國詔設緬甸宣慰使司以那羅塢為使於是緬有二宣慰使至宣德二年緬甸共推莽得刺為宣慰使許之自是只署緬甸而甸中之稱不復見

臣等謹按明太祖實錄二十八年二十九年俱有緬遣使訴百夷思倫侵奪境土事詳麓川土司傳英宗正統十二年命緬甸故宣慰子馬哈省以速刺並為宣慰使

時馬哈省以速刺遣使獻麓川叛蠻思任發首及諸俘獻至京故有是命至世宗嘉靖初孟養酋思陸子思倫糾木邦及孟密擊破緬殺宣慰莽紀歲分據其地緬訴於朝不報莽紀歲有子瑞體既長奪古喇地諸蠻畏服之假道於孟密攻孟養及迤西諸蠻以復前仇并招誘隴川干崖南甸諸土官欲入寇既覘知有備又慮他蠻襲其後乃遁歸此嘉靖三十九年事也萬厯初木邦蠻莫隴川干崖諸蠻悉附緬七年并

孟養地十年襲破干崖俄瑞體死子應裏嗣十一年
焚掠施甸寇順寧又破蓋達且窺騰衝永昌大理蒙
化景東鎮沅諸郡騰越游擊劉綏永昌參將鄧子龍
各提兵五千赴剿并調諸土軍應援大破之緬將之
守隴川孟養蠻莫者皆遁去二十二年巡撫陳用賓
設八關於騰衝留兵戍守募人至暹羅約夾攻緬殺
緬長子莽機搗古喇殘破自此不敢內犯然近緬諸
部附之如初崇禎末蠻莫思繇為緬守曩木河及黔

國公沐天波等隨永明王等走蠻莫思縣使告緬緬
遣人迎之傳語述萬厯時事并出神宗璽書索今篆
合之以為偽天波出已邛與先所頒文檄相比無差
始信

干崖

元世祖至元十三年立鎮西路

在柔遠路正西東隔麓川其地曰干賴睽曰渠瀾睽
白夷蠻居之中統初內附至是立為路隸宣撫司

臣等謹按元史世祖紀是年正月雲南行省賽音
諤德齊以改定雲南諸路名號來上殆即其時也
又明史土司傳是時置鎮西路軍民總管府領三
甸至洪武五年改鎮西府

明成祖永樂元年設干崖長官司

干崖舊名干賴睽東北接南甸西接隴川有平川衆
岡境內甚熱四時皆蠶以其絲織五色土錦充貢至
正統九年升為宣撫司弘治三年干崖土舍刀怕愈

欺其姪刀怕落幼叔印奪職蠻衆不服遂起兵相攻
四年副使林俊等移文往諭始釋兵歸印嘉靖三十
九年緬酋莽瑞體叛招干崖諸土官入寇萬曆初宣
撫刀怕舉死妻罕氏為木邦宣慰罕拔妹拔既叛附
緬召怕舉弟怕文襲職以臣緬且許以妹怕文不受
與戰緬兵十萬驟臨怕文潰奔永昌罕拔遂取干崖
印付罕氏十年隴川岳鳳破干崖奪罕氏印十一年
游擊劉綏破隴川鳳降追印竟不得而干崖部衆自

相承代亦莫得而考云

潞江

元世祖至元十三年立柔遠路

在大理之西永昌之南其地曰潞江曰普坪
瞻曰申
瞻
變塞曰烏摩坪
變蠻即通典所謂黑蠻也
中統初
變酋阿八思入朝至是與茫施鎮康鎮西平緬麓川
俱立為路隸宣撫司

明成祖永樂元年設潞江長官司

地在永昌騰越之間南負高崙山北臨潞江為官道
咽喉多瘴癘蠻名怒江甸至是內附其地舊屬麓川
平緬西平侯奏其地廣人稠遂設長官司治之宣德
三年黔國公沐晟奏潞江千夫長刀不浪班叛歸麓
川叔潞江逐曩壁入金齒據潞江驛逐驛丞周禮立
寨固守斷絕道路請發兵討帝敕晟與三司計議五
年晟奏刀不浪班懼罪還所據地歸舊部輸役如故
乞宥之報可

英宗正統五年安撫使線舊法以麓川叛來告

時思任發叛諭整兵以待未幾麓川賊遣部衆奪據
潞江遂削弱正德十六年安撫司土官安捧奪其從
弟掩莊田三十八所掩訟於官不報捧遂集蠻兵圍
掩寨縱火屠掠掩母子妻妾及蠻民男婦死者八十
餘人據有其地官軍誘執之捧死於獄帝命戮屍棄
市其子詔及黨與皆斬天啟間有線世祿者繼襲安
撫

南甸

元世祖至元二十六年置南甸路軍民總管府

南甸舊名南宋在騰越南半箇山下其山巔北多霜雪南則炎瘴如蒸是時置路領三甸

臣等謹按元史地理志載南甸軍民府不稱路其建置沿革皆闕焉

明太祖洪武十五年改南甸為府

永樂十一年改為州宣德三年南甸為麓川侵奪降

敕戒諭俾還侵地五年南甸州奏先被麓川奪其境
土賴朝廷威力復之若不置官司以正疆界恐侵奪
未厭乞置四巡檢司鎮之八年又奏與麓川接境舊
十二百夫長在騰衝千戶所時賴邦哈等處軍民兼
守後麓川侵據不守者十餘年今蒙敕諭竊恐再侵
百姓逃移乞於賴邦哈九浪莽孟洞三處各置巡檢
以土軍楊義等三人為之

正統九年升南甸州為宣撫司

先是二年土知州刀貢罕奏麓川思任發奪其所轄
羅卜思莊二百七十八村乞遣使齎金牌信符諭之
退還帝敕沐晟處置奏聞麓川之役自是起天順二
年宣撫刀落蓋奏南寧伯毛勝遣騰衝千戶蘭愈占
其招八地逼民逃竄敕以所占田寨退還治勝愈罪
明史土司傳曰南甸所轄羅卜思莊與小隴川皆
百夫長之分地知事謝氏居曩宋悶氏居蓋西屬
部直抵金沙江地最廣司東十五里曰蠻干宣撫

世居之南百里有闢立木為柵周一里曰南牙甚
高山勢延袤一百餘里官道經之上有石梯蠻人
據以為險

芒市

者樂甸茶山孟連里麻紐元東倘瓦甸促瓦
散令附

元世祖至元十三年立茫施路

在柔遠路之南瀘江之西其地曰怒謀曰大枯睽曰

小枯睽

即唐史所謂
茫施蠻也

中統初內附至是立為路隸宣

撫司

明太祖洪武十五年置茫施府

至正統七年總兵官沐晟奏茫市陶孟刀放草遣人來訴與叛寇思任發有讐今思任發已遁去思機發兄弟三人來居麓川者監地方願禽以獻兵部言放草先與思任發同惡今勢窮乃言結讐誣詐難信宜敕諭放草如能去逆效順當密調兵助剿思機發從之

英宗正統八年立茫市長官司

時思機發令其黨涓孟車等來攻芒市為官軍所敗
放草來降靖遠伯王驥請設芒市長官司以陶孟刀
放草為長官隸金齒衛成化八年木邦曩罕弄亂掠
隴川敕芒市等長官司整兵備調萬厯初長官放福
與隴川岳鳳聯姻導緬寇松坡營事覺伏誅立舍目
放緯領司事轄於隴川芒市川原廣邈田土富饒而
人稍脆弱云

明史者樂甸土司傳曰者樂甸本馬龍他郎甸猛

摩地名者島其地山險多瘴介於鎮沅元江景東
間日事攻戰鎗械犀利兵寡而勅諸部畏憚之洪
武末內附隸雲南布政司永樂元年以沐晟言改
設者樂甸長官司隸都司十八年後皆以刀氏世
領司事

又茶山長官司傳曰永樂二年頒給茶山長官司
信符金字紅牌宣德五年以長官司奏滇灘當茶
山瓦高之衝蠻寇出沒民不能安通事段勝頗曉

道理能安人心乞置滇灘巡檢司以勝為巡檢從之

又孟璉長官司傳曰永樂四年設孟璉長官司時孟璉頭目刀派送遣子壞罕來言孟璉舊屬麓川平緬宣慰司後隸孟定府而孟定知府刀名扛亦故平緬頭目素與等夷乞改隸遂設長官司隸雲南都司命刀派送為長官賜冠帶印章正統四年思任發反以兵破孟璉遂降於麓川為木邦宣慰

罕蓋法擊敗七年總督王驥征麓川招降孟璉亦保等寨敕賜孟璉故長官司刀派罕子派樂等綵

幣

以麓川平故也

嘉靖中孟璉與孟養孟密諸部仇殺數

十年司廢至萬曆十三年隴川平復設稱猛賧云

又里麻長官司傳曰永樂六年設里麻長官司時

刀思放為里麻招剛

招剛者故西南蠻官名

籍其地來朝請

授職事遂有是命仍賜印章冠帶

又鈕兀長官司傳曰宣德八年置鈕兀長官司鈕

兀五隆諸寨在和泥之地其首任者陀比等至京奏地遠蠻多請受職以總其衆兵部請設長官司從之遂以任者為長官陀比為副

又東倘長官司傳曰宣德八年置東倘長官司隸緬甸宣慰時緬甸宣慰昔得謀殺當蕩頭目新把的而奪其地新把的遣子莽只乞置司庶免侵殺從之命新把的為長官

又瓦甸長官司傳曰初隸金齒永樂九年土官刀

怕賴言金齒遠都司近遂改隸雲南都司宣德八年置曲石高松坡馬緬三巡檢司初長官司言曲石高松坡馬緬之地山高林茂寇盜出沒人民不安乞置三巡檢司以授通事楊資楊中范興三人從之命資於曲石中於高松坡興於馬緬正統五年長官早貴為思任發所獲殺其守者十七人挈家來帝嘉其忠順命所司褒賞以早貴為安撫賜綵幣誥命

又促瓦散金二長官司傳曰二司皆永樂五年設
隸雲南都司其地舊屬麓川平緬土蠻註甸八等
來朝請別設長官司從之命註甸八等為長官各
給印章

木邦

老撾附

元世祖至元二十六年立木邦路軍民總管府領三甸
臣等謹按元史地理志止載木邦路軍民府建置
沿革俱闕明一統志木邦舊名孟都一名孟邦其

風俗男貴女賤云

明太祖洪武十五年平雲南改木邦路為府

永樂元年麓川訴木邦侵地命西平侯論之因改木邦為軍民宣慰使司以知府罕的法為使賜誥印時官軍征八百罕的法發兵助戰攻江下等十餘寨斬首五百餘級詔賜白金錦幣及其部領有差明年罕的法卒其子罕賓發來請襲命賜冠服七年又遣人奏緬甸宣慰使那羅塔數誘罕賓發叛不敢從逆天

兵下臨誓當致命帝嘉其忠遣中官徐亮齎敕勞之
賜白金錦綺十一年罕賓發遣使獻緬甸俘時木邦
攻破緬甸城寨二十餘多所殺獲獻於京師

宣宗宣德八年木邦與麓川緬甸各爭地訴於朝

帝命沐晟并三司巡按公勘正統三年征麓川敕諭
木邦以兵會勦五年總兵官沐晟遣人間道達木邦
得報知宣慰祖母美罕板其孫宣慰罕蓋法與麓川
戰於孟定孟璉地殺部長二十人斬首三萬餘級獲

馬象器械甚衆帝嘉其功加授罕蓋法懷遠將軍封
美罕板太淑人七年總督王驥奏罕蓋法遣兵攻拔
麓川板罕貢章等寨追至孟蒙獲其孥七人象十二
麓川酋思任發父子遁孟廣帝命指揮陳儀往勞之
立曰木邦能自効生繫賊首獻其酬以麓川土地人
民八年木邦人謝免歲辦金恩并獻所獲思任發家
屬復賜敕獎勞十一年緬甸獻思任發首木邦亦遣
使與同獻因求麓川地兵部以麓川已設隴川宣撫

司請以孟止地給之并遣官諭祭其母以表忠勤免
木邦歲辦銀八錠三年從之

景帝景泰元年木邦宣慰罕蓋法奏乞隴川界者闡景
線地

時未及報罕蓋法子罕落法輒發兵據之隴川宣撫
刀歪孟訴於總兵官沐璘璘遣使諭歸之而與以底
麻之地四年罕落法襲父職族人構難罕落法避於
孟更遣人赴總兵官求救詔調兵撫諭之與其族人

部衆設盟而還然罕落法猶避居孟都不敢歸以地
近隴川歲調蠻兵二百更番護之天順二年罕落法
奏為思坑曩罕弄等所攻乞兵勦除命總兵官區處
六年總兵官沐瓚奏罕落法屢侵隴川地欲以撥守
貴州兵八千調回防禦詔留其半

川
憲宗成化十年木邦所轄孟密蠻婦曩罕弄等侵掠隴

曩罕弄者故木邦宣慰罕揲法之女嫁其孟密部長

思外法地有寶井據法卒孫罕落法嗣曩罕弄以尊
屬不樂受節制嗾族人與爭景泰中叛木邦遂宣慰
據公署殺掠隣境隴川孟養兵力日盛自稱天娘子
其子思柄自稱宣慰黔國公琮奏委三司官往撫不
服詔廷臣集議皆以孟密與木邦仇殺並未侵犯邊
境止宜撫諭因命副都御史程宗馳傳往
時成化十八年也
踰年孟密奏為木邦所擾乞別設安撫司兵部尚書
張鵬以太監覃平御史程宗撫馭已有成緒遂命宗

巡撫雲南敕平偕詣金齒勸諭之其孟密地或仍隸木邦或別設安撫區處具奏

二十年命設孟密安撫司

初曩罕弄竊據孟密貳於木邦畏隣境不平遣人從間道抵雲南至京獻寶石黃金乞開設治所直隸布政司閭臣萬安欲許之程宗復奏曩罕弄與木邦仇殺已久勢難再合已示諸蠻以朝廷德意宥其罪開設衙門令還其所侵地皆踴躍奉命木邦亦已允服

乞遂行之部覆從之至是遂有是命以思柄為使時
孟密據寶井之利資為結納而木邦為孟密所侵兵
力積弱不能報雖屢奏訴竟不得直云

明史木邦土司傳曰弘治二年雲南守臣奏孟密
曩罕弄先後占奪木邦地二十七處又誘其頭目
放卓孟等叛其勢必盡吞後已乞敕八百宣慰司
俾與木邦和好互相救援亦敕木邦宣慰收復人
心親愛骨肉勿使孟密得乘間誘叛自致孤弱如

孟密聽諭方許曩罕弄孫承襲報可并敕雲南守臣親詣金齒曉諭復降敕詰責前鎮巡官所以受賂召侮起釁者

孝宗弘治六年仍以孟密安撫隸布政司

時雲南守臣奏孟密侵奪木邦兵連禍結垂四十餘年屢撫屢叛勢愈猖肆請調兵往討兵部議以孟密安撫初隸布政司今改隸木邦以致爭殺仍如初隸可息兵從之

明史木邦土司傳曰木邦宣慰罕它法親迎婦於
孟乃寨孟密土舍思揲乘虛襲之據木邦誘降其
頭目高答落等聚兵阻路罕它法不得歸依孟乃
寨者三年於是巡撫張誥等會奏議遣文武大員
詣孟密撫諭思揲猶不服誥乃遣官督率隴川南
甸干崖三宣撫司積糧開道示以必征之勢罕它
法又乞救於鄰部調土兵合隴川等三宣撫兵至
蠻遮共圍之思揲懼乃罷兵

穆宗隆慶二年木邦土舍罕拔叛

初思標圍蠻遮木邦宣慰妻求救於孟養思陸孟密素畏思陸兵遂解去木邦與思陸謀共取孟密於是蠻中之患又在孟養矣先是萬安程宗勣處失宜諸酋長紛紜進退中國用兵且數十年嘉靖初思陸子思倫與木邦宣慰罕烈同擊殺緬酋莽紀歲而分其地後莽瑞體強將修怨於木邦至是罕拔告襲有司索賂不為請拔怒與弟罕章集兵梗往來通商旅不

前而已食鹽亦乏絕乞於緬緬以五千簞餽之自是
反德緬携金寶馬象往謝瑞體亦厚報之歡甚約為
父子瑞體死子應裏用岳鳳言誘拔殺之

時萬歷十一年也

拔子進忠守木邦應裏遣弟應龍襲之其孽子罕鳳
與耿馬舍人罕虔欲禽進忠獻應龍進忠携妻子內
奔虔等追至姚關焚順寧而去十二年官軍破緬於
姚關立其子欽欽死其叔罕禧約暹羅攻緬緬恨之
三十四年緬以三十萬衆圍其城請救於內地不至

城陷罕禧被擄緬僞立孟密思禮領其衆事聞黜總
兵官陳賓木邦遂亡

明史木邦土司傳曰孟密自思柄授安撫繼之者
曰思權曰思真真年至百十歲嘉靖中土舍兄弟
爭襲走訴於緬緬人為立其弟改名思忠忠遂以
其地附緬萬歷十二年忠齋僞印來歸命授為宣
撫已而復投緬乃以其母罕烘代掌司印緬攻孟
密罕烘率子思禮從子思仁奔孟廣而孟密遂失

十八年緬復攻孟廣罕烘思禮奔隴川思仁奔工
回而孟廣又失先是思仁從罕烘奔孟廣時有甘
線姑者思忠妻也思忠既投緬思仁通於線姑遂
欲妻之而罕烘不許至是罕烘攜線姑走隴川思
仁奔雅蓋率兵象犯隴川欲擄線姑去會隴川有
備弗克思仁亦走歸緬緬僞署思仁於孟密食其
地

又曰初孟密寶井朝廷每以中官出鎮司採辦武

宗朝錢能最橫至嘉靖隆慶時猶然萬厯二十年
巡撫陳用賓言緬酋擁衆直犯蠻莫其執詞以奉
開採使命令殺蠻莫思正以開道路全滇之禍皆
自開採啟之時稅使楊榮縱其下以開採為名恣
暴橫蠻人苦之且欲令麗江退地聽採緬酋因得
執詞深入巡按宋興祖極言其害請追還榮等帝
皆不納凡採辦必先輸官然後與商賈貿易每往
五六百人其屬有地羊寨在孟密東往來道所必

經人工幻術採辦人有強索其飲食者多腹痛死
所乘馬亦斃剖之則馬腹皆木石也思真嘗勦之
殺數千人不得絕至是議勦以兵少中止

又老撾土司傳曰老撾俗呼為撾家古不通中國
其俗與木邦同部長不知姓有三等一曰招木弄
一曰招木牛一曰招木化而為宣慰者招木弄也
代存一子絕不嗣其地東至水尾南至交趾西至
八百北至車里西北六十八程至雲南布政司成

祖即位土官刀線歹貢方物始置老撾軍民宣慰使司永樂二年以刀線歹為宣慰使至成化十七年安南黎灝率兵九萬開山為三道進兵破哀牢入老撾境殺宣慰刀板雅及其子二人其季子怕雅賽走八百宣慰刀攬邦遣兵送至景坎黔國公沐琮以聞命怕雅賽襲父職既怕雅賽欲報安南之仇覬中國發兵為助帝以老撾交趾皆服屬中國久恤災解難中國體也今琮慎遣人諭之嘉靖

二十四年雲南巡撫汪文盛言老撾土舍怕雅聞
征討安南首先思奮且地廣兵多可獨當一面八
百車里與老撾相近孟艮在老撾上流皆多兵象
請備征討可免其察勘就令承襲以備征調從之
四十四年時緬勢方張剪除諸部老撾亦折而入
緬符印皆失萬歷二十六年緬敗老撾來歸復鑄
印給之

孟養

元成宗元貞二年於孟養置雲遠路軍民總管府

時雲南省臣額森布哈征乞藍拔瓦農開陽兩塞其
黨答剌率諸蠻來降乞藍悉平以其地為雲遠路置
軍民總管府

明太祖洪武十五年改雲遠路為府

其地故屬平緬宣慰司平緬思倫發為其下所逐走
京師帝命西平侯沐春以兵納之還故地

成祖永樂二年升孟養府為軍民宣慰司

先是初即位改雲遠為孟養府至是升宣慰司四年
孟養與戛里相仇殺緬甸宣慰那羅塔乘釁劫之殺
宣慰刀木旦及子思樂發而據其地事聞詔行人齎
敕諭責緬那羅塔懼仍歸其境土會木邦宣慰使罕
賓法以那羅塔侵據孟養請自率兵討之遂破緬甸
城寨二十餘獲其象馬獻京師十四年復孟養宣慰
司命刀木旦次子刀得孟為使以木旦姪玉賓為同
知自木旦被害司遂廢孟養之人從玉賓散居于崖

金沙江諸處者三千餘人朝廷嘗命玉賓署宣慰使以撫之故仍命為本司同知令其率衆復業

宣宗宣德十三年敕數孟養頭目等匿思機發罪

先是五年刀玉賓奏伯父刀木旦被殺蒙朝廷授玉賓同知又阻於緬難寄居金齒者二十餘年今孟養地又為思任發所據乞遣兵送歸本土帝命黔國公沐晟遣還之然其地仍為思任發所有時為孟養宣慰者名刀孟賓亦寄居雲南及思任發敗奔緬甸子

思機發潛匿孟養求撫至是帝以孟養宣慰頭目刀
變蠻等匿思機發敕數其罪及兵出窮征思機發卒
遁去不可得正統十四年乃以孟養地給緬甸宣慰
馬哈省管治命捕思機發

景帝景泰二年思機發之子思卜發據孟養舊地

時思卜發遣使求管孟養舊地廷臣議已與緬甸豈
可移易時朝命雖不許然思卜發已潛據之即緬甸
不能奪也思卜發死子思洪發嗣每朝貢輒署孟養

地名儼然自有其地成化中太監錢能鎮雲南思任
發之遺孽思陸發數以珍寶遺能因得入貢稱孟養
金沙江思陸發常規立功以襲祖職適孟密安撫土
舍思揲侵據木邦地爭殺累年守臣議征之思陸發
乃請自効鎮巡官許之思陸發兵未至思揲解去巡
撫張浩遣使促發兵思陸發遣大陶孟倫索領蠻兵
象馬過江時思揲令陶孟思英以兵守蠻莫孟養兵
至思英堅守不出已而請和孟養兵聞官軍聽思英

約降頗有怨言官軍糧絕遽引退倫索亦恐思英絕其歸路取道干崖而還初靖遠伯王驥與之約誓非總兵官符檄不得渡江自是遂犯約數興兵過江與孟密戰

孝宗弘治七年孟養思陸作亂

思陸本麓川叛種竄居金沙江外成化中嘗據緬甸之聽蓋至是征調其兵渡江遂據騰衝之蠻莫又糾木邦兵攻燒孟密安撫司殺掠蠻民二千餘人劫象

馬金寶有并吞孟密覬覦故土之志迤西人恭們騰衝人段和為之謀主屢撫不聽十二年雲南巡按謝朝宣奏請驅歸江外而先是鎮守太監吉慶已為思陸請朝貢乃因朝宣疏并下鎮巡官議勦撫之宜數年不決巡撫陳金遣金騰參將盧和撫諭思陸和至騰衝諭以禍福令掣兵過江歸所占蠻莫等地且調隴川千崖南甸三宣撫司蠻兵及戰象隨官軍分道至金沙江思陸乃遣大陶孟倫索怕卓等率所部來

見和等再申諭之思陸聽命退還前所據蠻莫等地
十三處撤回象馬蠻兵渡金沙江而歸鎮巡官奏言
蠻莫等地原隸木邦成化間始為孟密所有近又為
思陸所據連年構禍今始平定既不可復與木邦孟
密又不可割畀隴川千崖南甸三宣撫宜暫於騰衝
歲撥官軍四百分番守之思陸前有助平思標功今
悔禍納款請賜以名目冠帶仍降敕獎諭部議以蠻
莫等處本木邦分地在大義宜歸之木邦其名目冠

帶貢使已言思陸不願受不宜輕畀請賜敕厚勞遣
歸之報可時思陸親得宣慰司印部報不予於是仍
數出兵與木邦孟密仇殺無寧歲

神宗萬曆十三年立孟養長官司

先是嘉靖七年總兵官沐紹勛巡撫歐陽重遣參政
王汝舟等徧歷諸蠻諭以禍福孟養思倫等各願退
地贖罪乃以蠻莫等十三處地方寬廣諸蠻歷年所
爭屬之騰衝司檄軍輪守則烟瘴可虞屬之木邦則

地勢遼遠蠻心不順莫若仍屬孟密管領歲徵差發銀而割孟乃等七處仍歸木邦罕烈則分願均而忿爭息矣報可至萬曆五年雲南巡按陳文燧言孟養思箇與緬世仇今更歸順於緬因引弘治朝先臣劉健嘗議孟養事狀謂思陸有官猶可制即無官其僭自若也不如因而官之以抗緬亦報可十一年緬為遊擊劉綎所敗孟養思威亦殺緬使降於綎至是隴川平乃於孟養立長官司未幾長官思真復為緬所

據部長思遠奉思真妻來歸給以冠帶令歸守思遠
乘亂自立為宣慰遠暴虐諸部恨之引緬兵至聲言
還思真思遠奔蓋西有思轟者內附與蠻莫酋思正
共據險抗緬三十年緬攻思正轟率兵倍道馳救至
則正已被殺三十二年緬攻入迤西轟走死緬以頭
目思華守其地華死妻怕氏代理緬人更番戍守連
年徵發從行甚苦曰孟養不亡蠻何得至此轟之後
曰放思祖有衆千餘不敢歸寄食於干崖

明史土司傳曰孟養蠻名迤水有香柏城舊制宣
慰遣人俱稱頭目唯木邦及緬甸又有陶孟及招
剛等稱孟養又有招八稱皆見於奏章因其俗不
改

車里

元世祖命將烏蘭哈達伐交趾經車里部降之

車里即古產里為倭沙貂獠諸蠻雜居之地古不通
中國至是置撒里路領六甸後又置耿棟路耿當孟

弄二州

臣等謹按元史烏蘭哈達伐交趾在憲宗七年十

一月不載車里降事成宗元貞二年十二月

地理志作

大德中立徹里軍民總管府雲南行省言大徹里地

與八百媳婦犬牙相錯今大徹里胡念已降小徹

里復占扼地利多相殺掠胡念遣其弟胡倫乞別

置一司擇通習蠻夷情狀者為之帥招其來附以

為進取之地詔復立蒙樣剛等甸軍民官與明史

有異今存以備考

明太祖洪武十五年改置車里軍民府

時蠻長刀坎來降即以爲知府十七年改置宣慰司
以坎爲使二十四年子刀暹答嗣永樂十一年暹答
卒長子刀更孟自立驕狠失民心未幾亦卒更孟長
子霸羨年幼衆推刀賽署司事

刀賽者更孟弟刀怕漢也

怕漢平

妻以前夫子刀弄冒爲暹答孫請襲十五年命刀弄
襲宣慰司以更孟從弟刀雙孟爲同知十九年雙孟

言刀弄屢以兵侵劫蠻民乞別設治所以撫其衆詔
分其地置靖安宣慰司升雙孟為使宣德九年靖安
宣慰刀霸供言靖安原車里地今分為二致有爭端
乞仍併歸車里從之命刀霸供刀霸羨共為宣慰使
嘉靖十一年車里折入緬

時緬酋莽應裏據擺古蠶食諸蠻車里宣慰刀糯猛
折而入緬有大小車里之稱以大車里應緬而小車
里應中國天啟七年巡撫閔洪學奏緬人侵孟艮孟

良就車里求救宣慰乃韞猛遣兵象萬餘赴之緬人
以是恨車里興兵報復韞猛年已衰重賂求和緬聞
韞猛子召河璇有女名召烏岡色美責獻烏岡河璇
別以女給之緬知詐大憤攻車里愈急韞猛父子不
能支遁至思毛地緬追執之以去中朝不及問車里
遂亡

八百

元世祖至元二十九年詔以軍征八百媳婦國

成宗大德五年四月調雲南軍征八百媳婦五月詔雲南行省自願征八百媳婦者二千人人給貝子六十索武宗至大三年正月詔諭八百媳婦遣雲南行省右丞蘇都魯噶招撫之仁宗皇慶元年六月敕雲南省右丞阿固台等領蒙古軍從雲南王討八百媳婦

臣等謹按明史土司傳謂元初征之道路不通而還考元史皇慶元年二年泰定三年八百媳婦屢

有入貢事

詳土貢考

蓋其時雖曾通使究未臣附也

順帝至正六年復立八百宣慰司以土官韓部襲其父

爵

臣等謹按明史土司傳謂遣使招附元統初置八

百等處宣慰司考順帝本紀不及載而於是年謂

復立宣慰司殆史氏之有脫誤也

明太祖洪武二十一年設八百宣慰司

永樂二年以土官刀招你為八百者乃宣慰使其弟

刀招散為八百大甸宣慰使是歲遣內官齎敕諭孟
定孟養等部道經八百大甸為刀招散所阻弗克進
三年西平侯沐晟奏奉命率師及車里諸宣慰兵至
八百境內破其猛利石崖及者答二寨又至整線寨
木邦兵破其江下等十餘寨八百恐遣人詣軍門伏
罪遂敕晟等班師宣德七年其貢使奏波勒土酋常
糾波勒土雅之兵入境侵掠乞發兵討之帝以八百
大甸去雲南五千餘里波勒土雅皆未嘗歸化勞中

國為遠蠻役非計止降敕撫諭而已成化十七年安南黎灝破老撾頒偽敕於車里期會兵攻八百其兵暴死者數千傳言為雷所震八百因遣兵扼其歸路襲殺萬餘交人敗還黔國公沐琮奏土官刀攬邦能保障生民擊敗交賊救護老撾交人嘗以偽敕脅誘八百八百毀敕以象蹴之請頒賞以旌忠義從之

明史土司傳曰八百世傳部長有妻八百各領一寨因名八百媳婦其地東至車里南至波勒西至

大吉刺與緬鄰北至孟艮自姚關東南行五十程
始至平川數千里有南格刺山下有河南屬八百
北屬車里好佛惡殺寺塔以萬計有見侵乃舉兵
得仇即已俗名慈悲國嘉靖間為緬所并其酋避
居景線名小八百緬酋應裏以弟應龍居景邁城
倚為右臂焉初四譯館通事惟譯外國而緬甸八
百如之蓋二司於六慰中加重焉

欽定續文獻通考卷二百四十三

欽定四庫全書

欽定續文獻通考卷二百四十四

四裔考

西南夷

貴州土司

明太祖洪武五年貴州宣慰霽翠等先後來歸

貴州古羅施鬼國漢西南夷牂牁武陵諸傍郡地元
置八番諸元諸軍民宣慰使司以羈縻之帝初克陳

友諒兵威遠振思南宣慰思州宣撫率先歸附即令以故官世守之至是霽翠與宋蒙古歹及普定府女總管適爾等來歸皆予原官世襲帝方北伐中原未遑經理南荒又田仁等歲修職貢最恭順至永樂十一年思南州相仇殺始以兵執送京師分其地為八府四州設貴州布政使司而以長官司七十五分隸馬屬戶部置貴州都指揮使領十八衛而以長官司七隸馬屬兵部府以下參用土官其土官之朝貢符

信屬禮部承襲屬吏部領土兵者屬兵部其後府并為六州并為四長官司或分或合釐革不一

明史貴州土司傳曰其地西接滇蜀東連荆粵崇山深箐鳥道蠶叢諸蠻種類嗜淫好殺畔服不常田仁智入朝太祖諭之曰天下守土之臣皆朝廷命吏人民皆朝廷赤子汝歸善撫之使各安其生則汝可長享富貴夫禮莫大於敬上德莫盛於愛下能敬能愛人臣之道也二十九年清水江之亂既平首臣以賊

首匿宣慰家宜并罪帝曰蠻人鴟張鼠伏自具常態
勿復問明初御蠻之道其後世之龜鑑也夫

臣等謹按明史貴州土司凡十有一今以一統志考
之類皆為府治而府之所領長官及巡檢司則惟貴
陽二十七思南四鎮遠二銅仁四黎平十安順五都
勻七平越二石阡一而已

貴陽

穆宗隆慶三年置貴陽府

貴陽舊為程番長官司洪武初置貴州宣慰司隸四川永樂十一年改隸貴州成化十二年置程番府至是移為貴陽府與宣慰司同城府轄城北司轄城南自後萬厯時改為貴陽軍民府領安撫司一曰金筑領長官司十八曰貴竹曰麻嚮曰木瓜曰大華曰程番曰韋番曰方番曰洪番曰卧龍番曰金石番曰小龍番曰羅番曰大龍番曰小程番曰上馬橋曰盧番曰廬山曰平伐其貴州宣慰司所領長官司九曰水

東曰中曹曰青山曰劄佐曰龍里曰白納曰底寨曰
乖西曰養龍坑

明史貴陽土司傳曰自蜀漢時濟火從諸葛亮南
征有功封羅甸國王後五十六代為宋普貴傳至
元阿畫世有土於水西宣慰司靄翠其裔也後為
安氏洪武初同宣慰宋蒙古反來歸賜名欽俱令
領原職世襲及設布政使司而宣慰司如故安氏
領水西宋氏領水東八番降者皆令世其職

安氏
世居

水西管苗民四十八族宋氏世居貴州城側管水東貴竹等十長官司皆設治所於城內銜列左右而安氏掌印非有公事不得擅還水西至天順時總兵官為之請許還水西以印授宣慰宋然代理先是宋然貪淫所管陳湖等十二馬頭科害苗民致激變而宣慰安貴榮欲并然地誘其衆作亂於是阿朶等聚衆攻陷寨堡襲據然所居大羊腸然僅以身免貴榮遽以狀上冀令已按治之會阿朶黨洩其情官軍進討貴榮懼乃自率所部為助及賊平貴榮已死坐追奪然坐斬然奏世受爵土負國厚恩但變起於榮而身陷重辟乞分釋因從末減宋氏亦遂衰子孫守世官衣租食稅聽徵調而已

神宗萬曆五年水西宣慰安國亨乞降命赦之

先是天順時安萬鍾應襲驕縱不法漢民張純土目

烏掛等導之游獵酒酣輒射人為戲又嘗撻其左右
為所殺無子其從弟萬鎰宜襲鎰以賊未獲辭烏掛
等遂以疎族幼子普者冒萬鍾弟曰萬鈞告襲承勘
官入其賄遂暫委鍾妻奢播攝事鎰悔不立而恨烏
掛主其謀遂以兵襲烏掛烏掛亦發兵相仇殺皆以
萬鍾之死為辭巡按御史上其狀以萬鎰宜襲但與
烏掛相誣訐宜各宥輸贖而梟殺鍾者并成純等受
其賄者亦罰治詔如之未幾鎰死子阿寫幼命以萬

銓借襲萬銓有助平阿向功乞加銜賜蟒帝命賜以
應得之服後阿寫長襲職改名仁未幾死子國亨襲
淫虐以事殺萬銓之子信信兄智與其母別居於安
順聞之因告國亨反巡撫王諍遽請發兵誅國亨智
遂為總兵安大朝畫策且約輸兵糧數萬及師至陸
廣河智糧不至諍乃令人諭國亨而止大朝毋進兵
已渡河為國亨所敗國亨懼大誅遣使哀辭乞降朝
廷未之許巡撫阮文中至檄捕諸反者密使語國亨

亟出諸奸徒割地以處安智母子還所費兵糧朝廷
當待汝以不死於是國亨悉聽命帝果赦不誅國亨
事起於隆慶四年至是年乃已

二十六年安國亨子疆臣助討楊應龍增其秩

國亨既革任日遣人至京納賂為起復地旋乞如播
州宣慰楊應龍獻大木例給冠帶誥封至是疆臣襲
職會應龍反疆臣亦以戕殺安定事為有司所案科
臣有言其逆節漸萌者詔不問許殺賊圖功巡撫郭

子章許疆臣以應龍平後還播所侵水西烏江地六
百里以酬功於是疆臣兵從沙溪入有蜚語水西佐
賊者總督李化龍檄詰之疆臣遂執賊二十餘人率
所部奪落濠關至大水田焚桃溪莊應龍伏誅遂增
官進秩

明史土司傳曰初應龍之祖以內難走水西客死
宣慰萬銓挾之索水烟天旺地聽還葬其地遂為
水西所據及播州平分其地為遵義平越二府分

隸蜀黔以渭河中心為界總督王象乾代李化龍
命疆臣歸所侵播州地子章奏言侵地始於萬銓
而非疆臣安氏迫取於楊相喪亂之時非擅取於
應龍蕩平之日且臣曾許其裂土今反奪故地臣
無面目以謝疆臣願罷去象乾言疆臣征播殲應
龍子惟棟不實首功可知至佯敗棄陣送藥往來
欺君助逆迹已昭然令還侵地不咎既往已屬國
家寬大若因其扶而予之彼不為恩我且示弱疆

臣既無功不與之地正所以全撫臣之信宜留撫
臣罷臣以為重臣無能與叢爾苗嘽省者之戒於
是清疆之議累年不決然議者多右疆臣尚書蕭
大亨遂主巡按李時華疏謂征播之役水西不惟
假道且又助兵矧失之土司得之土司播固輸糧
水亦納賦不宜以土地之故傷字小之仁地宜歸
疆臣於是疆臣增官進秩其母得賜祭水西尾大
之患於是不可制矣

熹宗天啓元年水西賊圍貴陽

先是萬曆三十六年疆臣弟堯臣襲四十一年烏撒土舍謀逐安効良堯臣以追卹為名領兵入滇直薄霑益州所過焚掠朝廷方以越境擅兵欲加堯臣罪而堯臣死子位幼命其妻奢社輝攝事社輝永寧宣撫奢崇明女弟崇明子寅獷悍與社輝爭地相仇恨而安邦彥者位之叔父素懷異志陰與崇明合及崇明反調兵水西邦彥遂挾位叛以應之更招故宣慰

土舍宋萬化為助率兵趨畢節陷之分兵破安順平
壩霑益而萬化亦率苗仲九股陷龍里遂圍貴陽自
稱羅殿王巡撫李灃聞變與巡按御史史永安悉力
拒守賊攻不能克則沿巖制柵斷城中出入鎮將張
彥芳赴援隔龍里不得進貴州總兵楊愈懋推官郭
象儀與賊戰於江門而死城中糧盡人相食而拒守
不遺餘力中朝方急遼不之省己以王三善為巡撫
倉卒調兵食大會將士分兵三道進三日抵龍頭營

屢敗賊兵遂奪龍里邦彥聞新撫自將大兵數十萬
懼甚遂退屯龍洞前鋒楊明楷率烏羅兵擊死安邦
俊遂乘勝抵貴陽城下先以五騎呼曰新撫至矣舉
城懼呼更生

貴陽圍十餘月城中軍民男婦
四十萬餓死幾盡僅餘二百人

貴陽圍

既解邦彥遠遁陸廣河外大軍至者日益衆三善欲
因糧於敵又諸軍視賊過易邦彥復糾諸苗來攻欲
再圍貴陽三善遣兵三路禦之破生苗寨二百餘禽
萬化等焚其積聚數萬龍里定番四路並通諸苗叛

者相繼降邦彥於鴨池陸廣諸要地掘塹屯兵為自
守計時奢崇明為蜀兵所敗計窮投水西與邦彥合
三年三善兵攻大方賊巢進營紅崖連破天台水脚
等七囤遂深入紅鳥岡諸苗奔潰奢社輝安位焚其
巢竄火灼堡邦彥奔織金位遂遣人赴鎮遠乞降於
總督楊述中許之令禽崇明父子自贖一意主撫而
三善責并獻邦彥當并用勦議不合往返數月邦彥
得益兵為備三善糧不繼焚大方還貴州道遇賊三

善為所害邦彥率數萬衆來追總理魯欽力禦之大
戰數日大軍無糧乘夜皆潰欽自剄賊燒劫諸堡苗
兵復助逆貴陽三十里外樵蘇不行城中復大震

明史土司傳曰初大方東倚播北倚蘭相為犄角
後播蘭既平賊惟恃烏撒為援而畢節為四夷交
通處當三善由貴陽陸廣深入大方百七十里皆
獼鬼巢窟以失地利而臨天啟間朱爕元為蜀督
建議滇兵出霑益過安効良應援分兵於天生橋

尋甸等處以絕其走蜀兵臨畢節扼其交通之路而別出龍場巖後以奪其險黔兵由普定渡思臘河徑趨邦彥巢由陸廣鴨池擣其虛粵西兵出泗城分道策應然後大軍由遵義鼓行而前尋以憂去未及用

愍帝崇禎元年詔起朱爕元總督貴雲川廣分兵勦賊貴陽平

奢崇明自號大梁王安邦彥自號四裔大長老其部

衆悉號元帥悉力趨永寧先犯赤水燹元授意守將
佯北誘深入度賊已抵永寧分遣別將林兆鼎從三
岔入王國禎從陸廣入劉養鯤從遵義入邦彥分兵
四應力不支羅乾象復以奇兵繞其背急擊之賊大
驚潰崇明邦彥皆授首邦彥亂七年而誅燹元乃移
檄安位赦其罪許歸附位豎子不能決其下謀合潰
兵來拒燹元扼其要害四面迭攻斬首萬餘級復得
嚮導輒發要害就食賊益饑復遣人至大方燒其室

廬位大恐遂率四十八日出降而前助邦彥故宣慰
宋萬化之子嗣殷亦至是始勦滅乃以宋氏洪邊十
二馬頭地置開州建城設官燮元復遣兵平擺金五
洞諸叛苗水西勢益孤十年安位死無嗣族屬爭立
朝議欲乘其敝郡縣之燮元奏未可驟乃傳檄土目
諭以威德諸苗爭納土獻印貴陽甫定而明亦旋亡
矣

思南

明太祖洪武二年命思南土官率其部長入朝

初帝起兵平偽漢畧地湖南思南宣慰使田智仁遣使來歸附并納元所授宣慰誥俾仍為思南道宣慰使思州宣撫使田仁厚亦遣使來獻鎮遠古州軍民二府婺川功水常寧等十縣龍泉瑞溪沿河等三十州於是命改思州宣撫為思南鎮西等處宣慰使司以仁厚為使二年仁厚死子弘正襲帝以思南土官世居荒服未嘗詣闕詔令率其部長入朝九年仁

智入覲時思州田弘正亦與其弟弘道等來朝帝命
禮部皆優賜十一年仁智子大雅襲命思南收集各
洞弩手二千人備征調十八年思州諸洞蠻作亂命
信國公湯和等討之時寇出沒不常聞師至輒竄山
谷間退則復出剽掠和等師抵其地恐蠻人驚潰乃
令軍士於諸洞分屯立柵與蠻人雜耕使不復疑久
之以計禽其魁餘黨悉定留兵鎮之二十年思州宣
慰弘正死子琛襲三十年大雅母楊氏來朝

成祖永樂十一年命思南三十九長官地更設州縣
時大雅死子宗鼎襲初宗鼎先暴與其副使黃禧構
怨奏訐累年朝廷以田氏世守其土又先歸誠曲與
保全改禧為辰州知府未幾思州宣慰田琛與宗鼎
爭沙坑地有怨禧遂與琛結圖宗鼎構兵琛自稱天
主禧為大將率兵攻思南宗鼎挈家走琛殺其弟發
其墳墓并戮其母屍宗鼎訴於朝屢敕琛禧赴闕自
辨皆拒命不至潛使奸人入教坊司伺隙為變事覺

命鎮遠侯顧成以兵壓其境執琛禧械送京師皆引服琛妻冉氏尤强悍遣人招誘臺羅等寨苗普亮為亂冀朝廷遣琛還招撫以免死帝聞而錮之以宗鼎窮威來歸得末減令復職還思南而宗鼎必得報怨以絕禍根帝以宗鼎幸免禍不自懲乃更逞忿亦留之宗鼎出詐言帝以琛宗鼎分治思州思南皆為民害其三十九長官地可更郡縣設貴州布政使司總轄之命顧成勦臺羅諸寨成斬苗賊普亮思州乃平

十二年遂分其地為八府四州貴州為內地自是始
兩宣慰廢田氏遂亡

明史土司傳曰思南即唐思州宋宣和中番部田
祐恭內附世有其地元改宣慰司明洪武初析為
二宣慰屬湖廣永樂十一年置思南府屬貴州正
統初蠻夷長官司奏土官衙門婚姻皆從土俗乞
頒恩命帝以土司循襲舊俗因親結婚者既累經
赦宥不論繼令悉依朝廷禮法違者罪之景泰間

思南府奏府四面皆山關隘五處無城可守乞發附近土軍修築命巡撫王來經畫之

臣等謹按永樂寶錄十二年以思州二十二長官司分設思州新化黎平石阡四府思南十七長官司分設思南鎮遠銅仁烏羅四府而於貴州設貴州等處承宣布政使司以總八府仍與貴州都司同管貴州宣慰司十三年改普安安撫司為普安州隸布政司此貴州為內地所自始也

鎮遠

明成祖永樂十一年改鎮遠州為府屬貴州

鎮遠故為豎眼大田溪洞元初置鎮遠沿邊溪洞招討使後改為鎮遠府洪武五年改為州隸湖廣至是仍改府屬貴州領長官司二曰偏橋曰邛水十五洞領縣二曰鎮遠即金容金達揚溪公俄二長官司地曰施秉即施秉長官司地也

英宗正統十二年命清水江等處設兵守禦

先是洪武三十年鎮遠鬼長箐等處苗民作亂官軍
擊走之宣德初鎮遠邛水與洞蠻苗章奴刼掠清浪
道中為思州都坪峩異溪長官司所獲其父苗銀總
刼取之聚兵欲攻思州因令赤溪洞長官楊通諒往
撫銀總伏兵殺掠又掠埂洞命總兵官蕭授調辰沅
諸衛兵萬四千人勦之會於清浪衛指揮張名討銀
總克與洞盡殺其黨銀總遁至是巡按御史虞禎奏
貴州蠻賊撫之不從捕之不得若非設策難以控制

臣觀清水江等處峭壁層崖僅通一徑出入彼得恃險為惡若將江外山口盡行閉塞江內山口并津渡俱設關堡屯兵守禦又擇寨長有才幹者為辦事官庶無疎虞從之

英宗天順七年洪江賊苗攻劫鎮遠官軍平之

時賊苗蟲蝦等糾合二千餘人偽稱王侯攻劫鎮遠壘寨撫諭不服命總兵官李震李安等分道入賊退守平坤寨官兵追至清水江獲蟲蝦并斬賊首飛天

侯苗老底額頭等復黎平之赤溪浦洞賊平

孝宗弘治十年改鎮遠金容金達長官司為鎮遠州設

流官

時土官何倫父子罪死土人思得流官守臣以聞報
可至萬厯末邛水長官司楊光春貪暴土目彭必信
濟之箕斂苗不堪將上訴改設流官光春與必信遂
謀反言官兵欲勦諸苗當斂金贖得金五百餘都御
史何起鳴調知之捕光春下獄瘦死於是每四戶擇

壯兵一人立四哨不為兵者佐糗糧魚鹽簡土吏何
文奎等掌之必信復釀諸苗金訴於朝言已也梁止
諸寨為亂指揮使陶効忠不問反索土官楊光春金
而殺之改舊例用新法不便書上意自得歸謁知府
王一麟一麟縛之下獄檄諸苗言若等十五洞所苦
者以兵餉月米三斗過甚耳然歲給白蠟鋪米每洞
月八斗他於平溪驛剩餘徵銀兩皆可足餉我為若
通之母為必信所誣苗皆悅服乃坐必信罪

明史土司傳曰天啟五年巡撫傅宗龍奏苗寇狍猖地方受害乞勅偏沅撫臣移鎮偏橋勿復回沅凡思石偏鎮等處俾練兵萬餘人平時以之勦苗大征即統為督臣後勁庶苗患寧而西賊之氣亦漸奪矣報可

銅仁

明成祖永樂十一年置銅仁府

先是元為銅人大小江等處軍民長官司洪武初改

為銅仁長官司至是置為府萬厯二十六年始改為
縣治領長官司五曰省溪曰提溪曰大萬山曰烏羅
曰平頭著可

明史土司傳曰烏羅者本永樂分置貴州八府之
一也所屬有朗溪答意治古三長官司而平頭著
可長官司亦隸焉宣德五年烏羅知府嚴律已言
所屬治古答意二長官石各野等聚衆出沒銅仁
平頭瓮橋諸處誘脅蠻賊石雞娘并篁子坪長官

吳畢郎等共為亂招撫不從緣其地與鎮溪酉陽諸蠻接境恐相煽為亂請調官土軍分據要地絕其糧道且捕且撫事聞命總兵官蕭授及鎮巡諸司議於是授築二十四堡環其地守之兵力分卒難扞禦七年巡撫御史言生苗之地不過三百餘里乞別遣良將督諸軍殄滅授言殘苗吳不爾等遁入箐子坪結生苗龍不登等攻劫湖廣五寨及白崖諸寨為患滋甚宜令川湖貴州接壤諸官軍

土兵分路併力攻勦庶除邊患從之八年授奏言
統率諸軍進攻賊巢破新郎等寨前後生禽賊首
斬吳不爾王老虎龍安軸等餘黨悉平并械吳不
跳等獻京師授威服南荒前後凡二十餘年正統
三年革烏羅府所屬治古答意二長官司亂後殘
民無幾亦并革之以烏羅平頭著可隸銅仁以朗
溪隸思南

世宗嘉靖二十二年平頭苗作亂命都御史萬鏜討之

自成化十一年烏羅苗人石全州妄稱元末明氏子
孫僭稱明王糾衆於執銀等處作亂隣洞多應之因
調官軍往勦全州就禽而諸苗攻劫未已命鎮巡官
設策撫捕未幾平至是平頭苗賊龍桑科作亂流劫
湖廣桂陽間甚獗帝以諸苗再叛責激亂者而起都
御史萬鏜往討之明年鏜奏叛苗以次殄滅未幾龍
子賢復叛三十九年總兵官石邦憲勦之禽首惡龍
老羅等遂平

黎平

宣宗宣德十年并新化入黎平

黎平元潭溪地初洪武三年辰州衛指揮劉宣武率兵招降湖耳潭溪新化萬平江歐陽諸洞納元所授印敕帝命皆仍其原官以轄洞民隸辰州衛既改龍里長官司為龍里衛又增立五開衛以鎮之隸思州二十九年清水江蠻金牌黃作亂都司發兵捕之金牌黃遁去捕獲其黨械至京以其脅從宥死三十年

古州洞蠻林寬者自號小師聚衆作亂攻龍里遂犯
新化突至平茶千戶紀達率壯士擊之遁去已復熾
命湖廣都指揮使統兵五萬進討城銅鼓衛禽寬等
械入京誅之三十二年復平其餘黨并俘獲三十岡
等處洞蠻二千九百人以歸遂班師永樂五年寨長
韋萬木自陳所統四十七寨乞設官因設西山陽洞
長官司以萬木為屯長十一年改置黎平新化二府
宣德六年改永從蠻夷長官司為永從縣置流官

以土

官李瑛
絕故也

又割思州新溪等十一寨隸黎平赤溪浦洞

長官司至是又并新化入黎平領長官司十三曰潭
溪曰八舟曰洪舟泊里曰曹滴洞曰古州曰西山陽
洞曰湖耳曰亮寨曰歐陽曰新化曰中林驗洞曰赤
溪浦洞曰龍里

英宗正統四年計砂苗作亂官軍平之

苗賊苗金蟲等糾合洪江生苗偽立名號劫掠四出
命都督蕭授調兵勦之賊首苗總牌等為都督吳亮

所戮洪江生苗遂詣軍門降授諭遣之命千戶尹勝
誘執苗金蟲斬以徇景泰五年苗賊蒙能欲取龍里
為巢穴攻破亮寨銅鼓羅圍堡諸城朝議以南和伯
方瑛為平蠻將軍統湖廣諸軍討之能糾賊衆三萬
出攻平溪衛瑛遣指揮鄭泰等以火鎗攻斃賊三千
人能亦死而能黨李珍等尚煽惑苗衆官軍計禽之
克復銅鼓竊洞連破鬼板等一百六十餘寨覃洞上
陸諸苗悉降

天順三年官軍攻東苗以捷聞

先是元年鎮守太監阮讓言東苗為貴州諸苗之首
負固據險僭號稱王逼脅他種東苗平則諸苗服會
同方瑛計議請師期於是頒諭四川湖廣諸宣慰宣
撫會師討賊至是督理軍務都御史白圭同瑛進青
崖令總兵李貴進牛皮箐叅將劉玉進谷種叅將李
震進鬼山所向皆捷克水車壩等一百四十七寨復
合兵青崖攻石門山克擺傷等三十九寨仍分四路

進攻董農竹蓋甲底等四百三十七寨賊首千把豬
退守六美山合兵大進斬五十餘級生禽千把豬送
京師伏誅

明史土司傳曰初麻城人李添保以逋賦逃入苗
中詭稱唐後聚衆萬餘僭稱王建元武烈署故賊
首蒙能子聰為總兵官遺之銀印勅書縱兵剽掠
至是為李震所敗餘賊大潰添保潛入鬼池及絞
洞諸寨復煽諸苗劫攻中林龍里亦為震禽伏誅

神宗萬厯二十八年皮林逆苗吳國佐石纂太等作亂
官軍討平之

國佐自稱天皇上將纂太亦自稱太保合兵圍上黃
堡官軍敗績遂焚五開破永從縣圍中潮所總兵官
陳璘合湖貴兵進討二十九年命巡撫江鐸會兵七
路進勦苗據險不出陳璘潛師奪隘縱火焚其巢國
佐逃禽之纂太亦為他將誘縛皆伏誅

安順

明英宗正統三年改安順州屬貴州

安順普里部蠻所居元世祖置普定府成宗時改普定路又為普安路並屬雲南洪武初為普定府十六年改為安順州隸為四川至是改屬貴州萬厯中改安順軍民府以普安等州屬焉

明史土司傳曰普安故軍民府也初隸雲南尋廢為衛永樂間改為州始隸貴州領長官司二曰寧谷曰西堡

天順四年西堡蠻賊作亂官軍討平之

先是洪武二十三年普安百夫長密即叛殺屯田官
軍及驛丞試百戶官軍失利於盤江木窄關更調將
統烏撒畢節永寧三衛兵勦之乃遁二十六年普定
西堡長官司阿德及諸寨長作亂官軍平之二十八
年又討平西堡土官阿傍三十一年西堡滄浪寨長
必莫者聚衆亂阿革傍等亦糾三千餘人助惡皆擊
斬之其地悉平至是蠻賊聚衆焚劫調川雲都司官

兵二萬并貴州宣慰安隴富兵二萬進勦至阿果禽賊首楚得隆等斬首二百餘級餘賊奔白石崖復斬級七百餘焚其巢而還成化十四年西堡獅子孔洞等苗作亂至次年禽斬賊首阿屯堅婁等以捷聞孝宗弘治十一年普安州土判官隆暢妻米魯反命尚書王軾等勦平之

米魯者霑益州土知州安民女適暢被出居其父家暢老前妻子禮襲父子不相能米魯與營長阿保通

因令阿保諷禮迎己禮與阿保同烝之暢聞怒立殺
禮燬阿保寨阿保挾魯與其子阿鮐等攻暢暢走雲
南時東寧伯焦俊為總兵官與巡撫錢鉞和解之魯
於道中毒暢死遂與保據寨反暢妾曰適烏生二子
別居南安米魯欲並殺之築寨圍其城又別築三寨
於普安而令阿鮐等防守鎮巡以聞發十衛及諸土
兵萬三千人分道進責安民殺賊自贖民乃攻斬阿
保父子於查刺寨米魯亡走焦俊等責安民獻魯民

陰資魯兵五百襲殺適烏及其二子據別寨殺掠又
自請襲為女土官鎮巡官皆受魯賂請宥魯嚴旨切
責必得魯乃已貴州副使劉福陰索賂於魯故緩師
賊益熾官兵敗於阿馬坡都指揮吳遠被擄普安幾
陷帝命軾等進勦破二十餘寨魯竄馬尾籠官兵圍
之就禽伏誅安民自辯得赦

都勻

明成祖永樂十一年改都勻指揮使屬貴州

都勻元曰都雲洪武十九年置安撫司二十九年改
軍民指揮使司屬四川至是隸貴州弘治七年置府
領州二曰麻哈曰獨山即合江洲陳蒙爛土長官司
地領縣一曰清平即清平長官司地領長官司八屬
府者曰都勻曰平浪曰邦水曰平州六洞屬獨山者
曰九名九姓曰豐寧屬麻哈者曰樂平曰平定
宣宗宣德元年平浪賊亂官軍平之

先是洪武二十二年都督何福討都勻叛苗收降寨

洞一百五十二處二十三年城都勻衛二十五年九
名九姓蠻亂命何福平之二十八年豐寧三藍等寨
亂命顧成平之二十九年平浪蠻殺土官都指揮程
暹平之永樂四年鎮遠侯顧成招諭合江州十五寨
來歸至是平浪賊紀那阿魯等占副長官地殺掠葉
果諸寨招諭不聽詔蕭授平之七年陳蒙爛土副長
官張勉奏所司去衛遠地連古州生苗與廣西獠洞
近化從寨長韋翁同等煽亂乞立堡并請調泗城州

土兵一千鎮守從之九年翁同糾下高大刀蠻合廣
西賊韋萬良等恣殺掠官軍討禽萬良等三人翁同
遂聽撫而落昌蔡郎等四十寨仍聚衆拒敵總兵蕭
授遣指揮討之

憲宗成化十四年都勻苗賊作亂命討之

陳蒙爛土長官司張鏞奏天壩干賊首齊果侵掠豐
寧長官司楊泰亦奏峰峒陸光翁等聚爛土為亂先
是宣慰楊輝平天壩干後即彎溪立安寧宣撫司爛

土諸苗惡其逼已至是果等既攻陷天漂遂圍豐寧
時輝已致仕子愛承襲力弗求援於川貴二鎮各
奏聞命仍起輝會兵討之十六年鏞復奏齎果糾合
九姓豐寧并荔波賊萬人攻剽愈亟乃命相機勦撫
二十年爛土苗賊龍洛道聲言犯都勻清平諸衛豐
寧長官楊泰與土目楊和有隙誘廣西泗城州農民
九千於鐵坑等一百餘寨殺掠於是苗患愈盛弘治
二年苗賊七千人攻圍楊安堡五年命鎮遠侯顧溥

等率官兵八萬人往征之七年諸軍分道進勦令熟
苗詐降於賊誘令入寇伏兵禽之直擣其巢凡破一
百十餘寨以捷聞於是開置都勻府及獨山麻哈二
州嘉靖十五年平浪叛苗王聰攻奪凱口壘初王阿
向先世為土官為王仲武先人所奪至阿向與仲武
爭印煽亂總兵楊仁等斬阿向等盡逐其黨以地屬
都勻府改名滅苗鎮仲武因諸苗失業陰為招復旋
科索之諸苗不勝怨遂推阿向餘孽王聰王佑為主

巡按楊春芳遣叅將李佑等撫諭之賊質佑等乞還
土田官印乃釋佑春芳以聞詔調官軍三萬人集壘
下壘故絕險其要害處置弩樓壘石為防攻之三月
不克復調宣慰安萬銓兵合勦萬銓力戰破賊聰等
皆伏誅

神宗萬曆六年天漂內附隸都勻府

黑苗曰天漂者在湖貴川廣界與者亞鼎足居至是
請內附都御史遣官往問狀而阻於者亞乃遠徙丹

彰間道通天漂會苗坪黨銀等亦以格於者亞不得
通都御史王緝遣使者亞部長阿斗斗願歸附平定
緝謂斗故養善牌部何故欲屬平定必有他謀下吏
按驗果得實蓋欲往平定借諸蒙兵襲養善皆內地
奸人天金貴等導之遂治金貴罪以者亞仍屬養善
路遂通於是苗坪天漂皆請奉貢賦比編氓名其地
曰歸化隸都勻府七年者亞阿斗以反誅乃罷樂平
吏目增設麻哈州州判一員令居樂平司以養鵝者

者亞羊腸諸苗屬之

明史土司傳曰初者亞阿斗反答干寨阿其應之
斗誅阿其屢犯順十四年土舍吳楠等慮阿其叵
測禍及己請以答干雞賈甲多諸寨屬蒙詔立宣
威營獨阿其不服引者亞殘苗圍宣威營又與雞
賈甲多仰枯諸蠻劫歸化官兵不敢近獨山土吏
蒙天眷以兵進勦斬阿其雞賈甲多皆降其屬蒙
詔者自答干雞賈甲多外有塘蛙當井斗坡等十

七寨小橋熟苗龍木恰視寨事年老子倖襲頒糧者遂不及恰恰輒奪俸之有以為養倖訴於官逮問恰輒鎮漢使官以計禽之死獄中無何龍化龍羊山苗引川苗作亂曰漢無故殺苗苗請報之官軍戰不利都司蔡兆吉招諭令降於是諸苗皆散四十三年平州苗為亂巡撫吳岳招降之

平州長官楊進雄兇惡土人苦之雄無子以兄繼祿子珂為後既生子治安而疎珂珂怨雄雄乃奪珂財

產并其父逐之珂頗得民心遂為亂據唐宿望攻雄
雄敗走屠其家各上疏許奏詔推問都御史趙鉞以
雄不法逮之獄檄獨山土酋蒙繼武諭珂歸命許改
土為流以安之治安計不便乃陰許以六洞賂繼武
借兵繼武乃發兵攻珂復平州珂走廣西之泗城繼
武遂屯耕六洞地六洞民不服復助珂與繼武相攻
珂復據平州巡撫吳岳招降其父繼祿六洞乃安

平越

明太祖洪武十四年置平越衛

平越古黎峨里元為平月長官司初洪武八年貴州江力江松刺回四十餘寨苗把具播共桶等連結苗獠二千作亂命指揮同知胡汝討之九年黃平蠻獠都麻堰亂命重慶諸衛合擊大破之平其地至是始置衛十九年平越衛麻哈苗楊孟等作亂命傅友德平之二十二年察隴牛場乾溪苗亂傅友德平之十三年命延安侯唐勝宗往黃平平越鎮遠貴州諸

處訓練軍士提督屯田相機勦寇

景帝景泰元年命勦逆苗蠻解平越諸圍

正統末鎮遠蠻苗金臺偽稱順天王與播苗相煽亂
遂圍平越新添等衛半年城中糧盡官兵逃者九千
餘人貴州東路閉時王驥征麓川班師過其地不之
顧至是命保定伯梁瑄佩平蠻將軍印督師進勦大
破之平八十餘寨禽賊首王阿同平越諸衛圍乃解
武宗正德十一年命巡撫秦金勦苗寇

先是景泰二年貴州苗韋同烈聚衆於興隆之截洞復攻平越清平等衛梁瑤自沅州發兵由東路都督方瑛由西路合兵興隆擊破之同烈退保香鑪山瑛由龍場都督陳友由萬潮山都督毛福壽由重安江攻破黎樹翁滿等三百餘寨斬三千餘級招撫衮水等二百餘寨合兵香鑪山下衆縛同烈降械至京五年黎從等寨賊首阿拏王阿傍苗金虎等偽號苗王與銅鼓諸賊相應七年巡撫蔣珪勦苗賊於平越斬

四百餘級其阿傍等據車挽寨仍為亂於清平平越
地方據香鑪山掠偏橋至是命金勦之

明史土司傳曰初黔楚之交羣苗嘯聚連寨相望
而香鑪山周迴四十里高數百尋四面陡絕其上
平行向為叛苗巢穴阿傍等據之糾諸寨苗作亂
巡撫鄒文盛等分漢土兵為五克其前柵密遣人
援崖先登殺賊守路者衆蟻附而上焚賊巢禽阿
傍餘賊猶堅守不下叅將洛忠等詭言招撫自山

後擊之殲焉遂移師龍頭黎蘭等寨悉破之賊遂

平

熹宗天啟四年凱里苗叛官軍大破之

土司楊世慰合安邦彥兵與平茶羣苗來修怨復窺
香鑪山搖動四衛梗塞糧運總督楊述中檄總兵魯
欽馳至清平相機進勦調副使顏欲章等為後援欽
督將領攻破巖頭分遣朗溪司田景祥截平茶賊援
用藥弩及礮殺傷賊衆賊乘夜遠遁自是不敢再窺

鑪山四衛得安

石阡

明成祖永樂十一年置石阡府

石阡本思州地至是置為府隸貴州領長官司四曰
石阡曰苗民曰葛彰葛商曰龍泉坪宣德六年葛彰
葛商長官安民奏前以官鈔糴糧儲備令蠻民守視
溪洞險僻無所支用恐歲久腐爛賠納實難請以充
有司祭祀遇使廩給之用從之

新添

明太祖洪武二十九年置新添衛

新添故麥新地宋時克之乃改為新添元置新添葛
蠻安撫司先是四年置長官司二十三年改為衛至
是置軍民指揮司領長官司五曰新添曰小平伐曰
把平寨曰丹平曰丹行

明史土司傳曰洪武七年平伐谷霞谷浪等苗攻
劫的教諸寨指揮僉事張岱攻谷峽刺向闕破之

追至的教大破之禽的令的若而還蠻大警宣德
元年新添土舍宋志道糾洞蠻肆掠蕭授討禽之
九年丹行土舍羅朝煽誘寨長卜長逃民羅阿記
等侵占卧龍番長官龍保地又攻猺平寨焚劫時
苗民素憚指揮李政尚書王驥因奏遣政往撫之
神宗萬曆三十四年巡撫郭子章平貴州苗

先是貴州東西二路苗名曰仲家者盤踞貴龍平新
之間為諸苗渠帥其在水硯山介於銅仁思石者曰

山苗紅苗之羽翼也窺黔自平播後財力殫竭有輕漢心經年剽掠無虛日命相機進兵子章乃命總兵陳璘等率官軍五千益以土兵五千攻水硯山監軍布政趙健率宣慰土兵萬人使游擊劉岳等督之及兩路會師皆九十餘日而克二寇既平專命總兵陳璘率漢土兵五千移營新添進攻東路苗不一月復克其六箐諸苗盡平

金筑

明太祖洪武二十九年以金筑隸貴州

先是四年故元安撫密定來朝詔賜文綺置金筑長
官司隸四川行省以密定為長官世襲十四年以獻
馬助征討敕嘉其誠升長官司為安撫司仍以密定
為使至是隸貴州軍民指揮使司自後萬歷四十年
安撫金大章乞改土為流設官建治欽定州名鑄印
信命改州判為流官授大章土知州予四品服色不
許管事子孫承襲隸州於貴陽府遂改金筑為廣順

州



欽定續文獻通考卷二百四十四